



ATASSUT

UKA 2015/132+47

Steen Lynge

30.11.2015

**Inuit annertuumik innarluutillit ilinniartitaanissamik qanoq iliorluni allatuulli neqeroorfigi-neqartalernissaat pillugu pilersitsinissaq siunertaralugu, matumani Aspergers Syndromimik nappaatillit ilanngullugit apeqquteqaat aallaavigalugu Inatsisartut oqallinnissaannik siunnersuut.**

(Inatsisartunut ilaasortat, Siumut)

aamma

**Apeqquteqaat aallaavigalugu inuit innarluutillit uagut inuiaqatigiittut pitsaanagerusumik ilaatinneqalernissaat angusinnaaneripput apeqquteqaatigalugu saqqummiussamik siunnersuut. Qanoq iliuuseqarnikkut ilumoortumik piviusorsioortumillu inuit timimikkut innarluuteqartut innarluutilittut pillugit inatsisimmi pineqartut ilinniartitaanermi aaqqissuussinermut kingornatigullu suliffeqarfinnut isertinneqarsinnaappat? Qanoq ililluta ilinniartiitaanikkut aaqqissuussineq initunerusoq aammalu suliffeqarfeqarneq inunnut timimikkut innarluuteqartunut periarfissiineq pilersissinnaavarput?**

(Inatsisartunut ilaasorta, Agathe Fontain, Inuit Ataqtigiit)

Siullermik ATASSUT sinnerlugu siunnersuuteqartut immikkoortoq 132-mut – Siumup Inatsisartunut ilaasortaaitai aamma immikkoortoq 47-mut Inuit Ataqtigiit sinnerlugit Inatsisartunut ilaasorta, Agathe Fontain qutsavigissavagut innarluutilinnut ilinniarnissamik periarfissat pillugit apeqquteqaatit aallaavigalugit oqallinnissamut siunnersuuteqarmata – imatullu ATASSUT sinnerlugu siunnersuutit oqaaseqarfigissavagut:

ATASSUT-mit siunnersuuteqartut tamaasa tunggaviusumik isumaqatigilluinnarpai innarluutilittatta inuiaqatigiinni atugassarititat tungaatigut sapinngisamik allatuulli ulluinnarni inuunerisa naleqarluarnissaanut nunatsinni periarfissagissaarnerusariaqarneri.



ATASSUT-mili isumaqarpugut innarluutilinnut tunngatillugu suliniutit ataqatigiissarneqarluartariaqarlunnartuusut, sapinngisamimmi allanngujaatsunik atugassaqartitsinissaq qitiulluinnartariaqarmat, taamaattumik sulisorineqartussat immikkut innarluutilinnut ilisimasallit piginnaasallit pisariaqartinneqassapput. ATASSUT-mit isumaqarpugut pingaaruteqartoq eqqaamassallugu aamma eqqumaniarfigissallugit innarluutit assigiinnngitsuusarmata taamaattumik aamma periarfissaasinnaasut assigiinnngitsut nalilersoqqissaarneqartariaqarput ilisimasalinnit minnerunngitsumillu aamma atuisuusussat ilaqaataasullu qanimut isumasiorneqarnissaat pingaaruteqassalluni.

Siumumit siunnersuuteqartut Aspergers Syndrom-imik nappaateqartut immikkut siunnersuuteqarnerminni taavai, ATASSUT-mit isumaqarpugut pingaaruteqartoq erseqqissumik paasiniarneqartariaqartut nunatsinni innarluutilittut nalunaarsorsimasut qanoq amerlatigineri sumillu innarluuteqartuuneri, tamatumap saniatigut aamma ATASSUT-mit pisariaqarsorivarput siusinaarluni soraarnerussutisiallit qanoq sulisinnaassuseqarneri imaluunniit arlaatigut piginnaangorsarneqarsinnaaneritut piginnaasaqartigineri.

Ila eqqumaniarfigisassat imaannaanngeqaat aammalu assigiinnngisitaartunik aaqqiissuteqartariaqarnissat pisariaqartussaassapput. Tamatumap saniatigut aamma inuusuttortavut ilaatigullu innarluutilittut nalunaarsorneqarsimanngitsut inuttulli tarnip nakorsaanik assigusumilluunniit ikorfartorneqarnissaminnik pisariaqartitsisut aamma ilinniakkaminnik ingerlattitsiinnarsinnaaneri aqutissiuunneqartariaqarput – ilaatigummi naliginnaasumik ilinniartunut malittarisassat naapertorlugit taakkununga sapernarsinnaasarmat aamma eqqumaniarfigineqartariaqartut ATASSUT-mit isumaqarfigivagut.

Naggasiullugu ATASSUT-mit qilanaarivarput nuna tamakkerlugu innarluutilinnut sullissiviup Sisimiuni maanna sanaartorneqartup 2017-mi naammassineqarnissaa.

Taamatut ATASSUT-mit naatsumik oqaaseqarluta siunnersuuteqartut Inatsisartut oqaaseqaatissaatut siunnersuutai taperserpavut.